

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj:01-02-16423/21
Sarajevo, 01.10.2021. godine

OPĆINA NOVI GRAD SARAJEVO OPĆINSKI NAČELNIK

PREDMET: Vijećnička pitanja i inicijative, dostavlja se

Na 7. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

a) Vijećničke inicijative

-vijećnik Adi Škaljić-

1.uspostavljanje saradnje sa Udruženjem građana “Zašto ne” kroz pristupanje projektu „Javna rasprava“.

OBRAZLOŽENJE *javnarasprava.ba* je web platforma na kojoj građanke i građani imaju mogućnost direktnog učešća u procesima donošenja odluka, kao i priliku da komuniciraju sa onima koji te odluke predlažu i usvajaju. Putem ove stranice može se saznati više o procesu donošenja odluka na nivou lokalne samouprave; uključiti se u raspravu o prijedlozima koji se nalaze u proceduri i komunicirati sa izabranim vijećnicama i vijećnicama. U cilju podizanja transparentnosti rada lokalne izvršne vlasti, ali i mogućnosti kvalitetnijeg ocjenjivanja rada izabranih predstavnika građanki i građana, od vas tražim da pratite primjer drugih lokalnih zajednica i realizirate ovu inicijativu.

NAPOMENA

Za ovu inicijativu tražim prethodno izjašnjavanje Općinskog vijeća.

2. ponovno angažovanje Službe civilne zaštite kao asistencije u radu domova zdravlja Saraj polje i Novi Grad te ambulanti porodične medicine na prostoru Općine Novi Grad Sarajevo.

OBRAZLOŽENJE Epidemiološka situacija u našoj općini polako, ali sigurno približava se zabrinjavajućem stanju iz novembra 2020. i marta 2021. godine. Ovog proljeća, prenapregnutoj primarnoj zdravstvenoj zaštiti svoje usluge je redovito davala i Služba civilne zaštite. S obzirom na informacije o sve većem prilivu pacijenata, predlažem da što je prije moguće Služba počne kontinuirano dezinficirati prostorije objekata domova zdravlja, COVID objekta i ambulanti porodične medicine, te da se iz struktura Civilne zaštite angažuju redari koji će asistirati u COVID ambulanti, kao i da se za potrebe DZ "Novi Grad" osigura potrošni medicinski materijal.

3.U kojoj je fazi procedura izdavanja građevinske dozvole za objekte benzinske pumpe, naftnog terminala i hotela u ulici Kurta Schorka, čiji je investitor kompanija HIFA OIL d.o.o. Tešanj?

Da li je investitor priložio svu dokumentaciju koju predviđa urbanistička saglasnost, uključujući i Odobrenje za lokaciju i korištenje zapaljivih tečnosti i gasova, koje izdaje Inspektorat za zaštitu od požara pri Ministarstvu unutrašnjih poslova Kantona Sarajevo?

OBRAZLOŽENJE U cilju bolje informisanosti građanki i građana, ali i mene kao vijećnika, molim nadležne iz gore navedene službe da što prije odgovore na postavljena pitanja. Pitanje izgradnje navedenih objekata je od velikog interesovanja za stanare obližnjih objekata kolektivnog stanovanja, pa očekujem ekspeditivan i jasan odgovor.

-vijećnica Maja Muftić Dedović-

1. Iniciramo da se definiše procedura rješavanja kada fizičko ili pravno lice koje je vlasnik zelenila i rastinja unutar svoje parcele, ometa odvijanje saobraćaja na javnoj cesti, ulazi u cestovni pojas, smanjuje preglednost i zaklanja saobraćajnu signalizaciju. Iniciramo da se riješi pomenuti problem u ulici Rogatička, te da se spriječi dalje ugrožavanje sigurnost saobraćaja.

2. Iniciramo da se pokrene procedura za izgradnju odnosno smještanje autobuske stanice na lokaciji Rajlovac.

3. Iniciramo postavljanje vertikalnog saobraćajnog znaka "zabrana zaustavljanja i parkiranja" na lokaciji autobuskog stajališta u Rajlovcu. Trenutno na pomenutom lokalitetu, na predviđenom proširenju za zaustavljanje vozila javnog prevoza, parkiraju motorna vozila. Kako motorna vozila parkiraju na dijelu saobraćajnice koja je stajalište za vozila javnog prijevoza putnika dolazi do ugrožavanja sigurnosti drugih sudionika u saobraćaju ili predstavlja smetnju za normalan tok saobraćaja ili kretanje pješaka. Saobraćajni znak je od izuzetne važnosti za pješake i vozače istovremeno.

4. Molim vas da nas informišete u kojoj fazi je rekonstrukcija vodovodne mreže u ulici Numan paše Čuprilića?

5. hitno renoviranje pješačkih staza u ulicama Ive Andrića i Olimpijska.

OBRAZLOŽENJE: Od križanja sa ulicom Semira Frašte do križanja sa ulicom Safeta Hadžića, pješačka staza uzulicu Ive Andrića nalazi se u katastrofalnom stanju. Ista situacije je sa Olimpijskom ulicom, cijelom dužinom, od križanja sa ulicom Safeta Hadžića do kružnog toka u ulici Ante Babića. Ovaj nivo zapuštenosti javne infrastrukture u jednoj od gradskih općina je nedopustiv. Kretanje osoba koja koriste invalidska kolica ili roditelja sa djecom u kolicima je na određenim tačkama totalno onemogućen. Molim vas da do kraja trenutne građevinske sezone asfaltirate ove staze.

-vijećnik Fahrudin Tinjak -

da se ustupi trenutno nekorišteno zemljište u vlasništvu općine Novi Grad Sarajevo, školi fudbala Sparta, sa sjedištem u općini Novi Grad Sarajevo, na PRIVREMENO korištenje, definisano do roka privođenja krajnjoj namjeni navedenog zemljišta, a za potrebe prilagođavanja istog za obavljanje sportskih aktivnosti – trenaznog procesa mladih fudbalera Škole fudbala Sparta. Škola fudbala Sparta je saglasna, da se u slučaju privođenja ustupljenog zemljišta krajnjoj namjeni odriče bilo kakve naknade za ulaganja koja do tada budu investirana u zemljište.

Obrazloženje

Evidentno je da imamo nedovoljan broj sportskih igrališta kako u Općini Novi Grad, tako i na prostoru cijelog Kantona Sarajevo, a posebno onih koji mogu zadovoljiti potrebe kvalitetnog razvoja mladih sportista. Činjenica je da unatoč velikoj raprostranjenosti raznih tehnoloških „mamaca“ za mlade, naši mladi uzrasti još uvijek imaju želju i potrebu da se bave sportom, a znamo da je u Bosni i Hercegovini fudbal i dalje broj jedan kada je u pitanju interes za sport kod mladih.

Također, svjedoci smo da se prije par mjeseci desio jedan tragični slučaj kada je u pitanju omladinski fudbal u Bosni i Hercegovini, naime, došlo je do gašenja čuvene škole fudbala FK Sarajevo „Asim Ferhatović Hase“, a najviše iz razloga loše razvijenosti sportske

Infrastrukture, tj. situacije gdje su sportske organizacije primorane plaćati visoke zakupe za sportske terene, a paralelno tome se sport u našoj zemlji naplaćuje i na žalost postaje luksuz.

I na žalost to nije jedinstven slučaj. Činjenica koja bi trebala još više da nas sve zabrine jeste da su u poslednjih 6 mjeseci ugašene dvije škole fudbala sa područja općine Novi Grad i to Škola fudbala FK Olimpik i Škola fudbala Dar. Ulazimo u jedan začarani krug, gdje sport sve više postaje nedostupan svima i u ovom ritmu može doći do potpunog kolapsa sporta u našoj zemlji.

Od strane Škole fudbala Sparta analizirano je područje Općine Novi Grad i evidentirano je mnogo neiskorištenog prostora a koja bi se uz adekvatna ulaganja i održavanje mogla pretvoriti u korisna sportska igrališta. Ovom inicijativom ne traze se NIKAKVA investicijska ulaganja od strane Općine,

ni pokrivanja troškova održavanja. Ovom inicijativom traži se samo da se određena lokacija ustupi na PRIVREMENO korištenje, tj. do privođenja zemljišta krajnjoj namjeni.

Škola fudbala Sparta bi se obavezala da neće izvoditi nikakve građevinske zahvate na navedenoj lokaciji, osim minimalnog nivelisanja i prilagođavanja zemljišta potrebama trenažnog procesa, također, da isto uređuje i održava tokom cijelog vremena korištenja zemljišta.

Također, u cilju razvoja sporta Škola fudbala Sparta bi ostavila mogućnost da u određenim periodima godine, organizuje besplatne treninge za djecu sa područja Općine Novi Grad, na principu "otvorene

škole", zatim, da će nastaviti razvijati vlastitu školu fudbala u kojoj trenutno trenažni process obavlja blizu 350 igrača u uzrastu od 4 do 12 godina, i u toj oblasti su najmasovnija škola fudbala u Bosni i Hercegovini. Nekoliko dodatnih činjenica o Školi fudbala Sparta:

- Škola fudbala Sparta je jedina škola fudbala sa područja Općine Novi Grad koju je FK Sarajevo izabralo za svog partnera kada je u pitanju razvoj omladinskog fudbala.

- Škola fudbala Sparta je partner FK Vojvodina Novi Sad, jednog od najvećih klubova na Balkanu.

- Škola fudbala Sparta je nosioc licence "CHAMPIONS TROPHY" sa sjedištem u Beču, a radi se o najvećem svjetskom takmičenju za omladinski fudbal.

- Škola fudbala Sparta je organizatori Evropskog finala "Champions Trophy" za generaciju U9 koji se ove godine održao u Sarajevu, na stadionu Otoka. Već naredne godine svoj dolazak na Evropsko finale najavile su najveće svjetske ekipe poput: FC Liverpool,

- FC Porto, FC Borussia Dortmund, HNK Dinamo, FK Crvena Zvezda i mnogi drugi.

Ova inicijativa dakle, nema nikakvog opterećenja za Općinu Novi Grad Sarajevo, a ima višestruku korist za razvoj sporta i svih mladih koji žele da se bave fudbalom.

U nastavku informacije o zemljištu:

Zemljište se nalazi u Halilovićima, preko puta kompanije Comtrade u blizini šoping centra FIS.

KO Novo Sarajevo IV. Parcele: 3781/2, 3784, 3785/2 i 3786

-Vijećnica Ajša Saračević-

1.U ime Kluba vijećnika SDP BiH Novi Grad Sarajevo upućujem inicijativu Turističkoj zajednici Kantona Sarajevo i Vladi Kantona Sarajevo za snažniju i veću podršku prvoligašima i vrhunskim sportistima u Kantonu Sarajevo, među kojima posebno ističem RK Bosna Sarajevo.

Oblazloženje: RK Bosna Sarajevo je sedmerostruki prvak BiH, te peterostruki pobjednik Kupa BiH.

Nakon 20 pobjeda u minuloj sezoni izorio je povratak u društvo najboljih. Trebamo im biti vjetar u leđa i podrška kako bi blistali sjajom kao nekad.Klub koji čine talentovana omladina zaslužuje uključivanje i podršku svih nivoa vlasti, jer upravo su oni predstavljali jednog od naših najboljih ambasadora u Evropi i svijetu a nadamo se da će tako biti i u budućnosti.

2. U ime Kluba vijećnika SDP BiH Novi Grad Sarajevo upućujem inicijativu JP Lokom d.o.o. da slijedi primjer Vlade Kantona Sarajevo i da izvrši korekciju cijena na četiri parkinga i dvije garaže kojima upravlja, a u svrhu izjednačavanja prava svih stanovnika na području općine Novi Grad Sarajevo.

Oblazloženje: Na jednoj od prethodnih sjednica postavljala sam pitanje zašto se došlo do korekcije cijene u vremenu pandemije COVID-19 u 2020. godini parkinga na Alipašinom polju C-faza sa 46,00 KM na 60,00 KM, što se pravdalo velikim troškovima plata zaposlenih, a onda smo u izvještaju mogli vidjeti da je samo na ovom parkingu ostvaren gubitak od 13.233,36 KM.

Da se zaključiti da naznačena opravdanost povećanja cijene je dovela samo do još većeg gubitka na predmetnom parking prostoru. Vlada Kantona Sarajevo je odlukom izvršila korekcije cijena na parking prostorima u naseljima Dobrinja i Saraj Polje, kojima upravlja KJKP „Rad“ d.o.o. Sarajevo, i to: gornje etaže sa 40,00 KM na 20,00 KM i garažna mjesta sa 60,00 KM na 50,00 KM. Na osnovu gore navedenog, stanovnici na području općine Novi Grad Sarajevo koji koriste usluge JP Lokom će se naći u lošijoj situaciji, jer će za istu uslugu plaćati tri puta veću cijenu, što može dovesti do otkazivanja ugovora o korištenju parking prostora i puno većih gubitaka JP Lokom.

-vijećnik Dino Okerić-

Pokrećem inicijativu da se ispred novootvorenog vrtića Umihana Čuvidina, izgradi igralište za djecu. Obrazloženje: 92 djece nema gdje da se igra, a ima veliki prostor ispred vrtića koji nije uređen i nije postavljena nijedna klupa, tobogan ili ljulja. Obzirom na veliki broj djece, neophodno je da se to uradi, kako ne bi djeca dnevno provodila u zatvorenom prostoru 8-10 sati, nego da mogu izaći u park i igralište. Roditelji su nas zamolili da pokrenemo inicijativu da se traži od općine i kantona da se to realizuje.

-vijećnik Enisa Spahić-

1. Na molbu roditelja đaka osnovne škole „Aleksa Šantić“ čija je saobraćajna sigurnost ugrožena, pokrećem inicijativu da se na raskrsnici u ulici Ramiza Salčina, koja vodi prema osnovnoj školi „Aleksa Šantić“ :

- obnovi pješački prelaz zebra, koji se gotovo i ne vidi
- postavi saobraćajni znak „ blizina škole“ kako bi se usporio saobraćaj
- orežu stabla i rastinje koje je potpuno zaklonilo putokaz za školu

2. Inicijativu da se razmotri mogućnost izdavanja urbanističke saglasnosti za postavljanje Spomen ploče kod kasarne u Rajlovcu ubijenim vojnicima bataljona Vojne policije u brigadi za Taktičku podršku Oružanih snaga BiH Nedeljku Radiću i Arminu Salkiću na molbu rodbine i prijatelja.

-Vijećnik Aida Ožegović-

Pitanja se odnose na istu temu „ Izgradnja benzinske pumpe i naftnog terminala u naselju Dobrinja“ tako da su napisana u ovom obliku:

1. Molim da se precizno utvrdi koliko kvadratnih metara korisne površine ima kompleks koji se gradi i u čijoj nadležnosti je izgradnja istog?
2. Molim da se ispita na koji način je odnesena Okolišna dozvola obzirom da nije provedena Javna rasprava o izgradnji i da li je urađena studija o utjecaju na okoliš?
3. Da li je Općina Novi Grad postupila u skladu sa mišljenjem Zavoda za planiranje KS i ako nije zašto se to desilo?
4. Da li je izdata Upotrebna dozvola za navedeni objekat obzirom da su stanovnici Dobrinje primjetili punjenje tankova koji su već postavljeni u zemlju?

-vijećnik Adis Pljevljak-

Primijećeno je prisustvo članice Općinske izborne komisije Adise Šuman na stranačkim sastancima za što imamo dokaze, iako su izbrisani slike sa zvanične stranice SBIHa. Član OIKa ni u kojem slučaju ne bi smio biti politički aktivan, već bi trebalo da bude nestranački i nepristrasan, a iz gore navedenih činjenica možemo zaključiti da to nije tako. iz tog razloga tražimo da sama podnese ostavku ili će se u suprotnom od Centralne izborne komisije BiH (CIK) tražiti reakcija

-vijećnik Mirza Selimbegović-

1. Inicijativa – Park Prijateljstva

Prijateljska država Republika Azerbejdžan, preko Fondacije „Heydar Aliyev“, finansirala izgradnju novog, modernog parka na Dobrinji i u njemu izgradila dva spomenika koji simboliziraju majke Srebrenice i Hodžalija (Khojaly). Park je otvoren 2012. godine.

Nažalost spomenik nije održavan od strane Općine Novi Grad. Sramotno je da su spomenici obje majke, njihove šamije, debelo nagrižene ptičijim izmetom. Fotografije prilažem uz inicijativu.

Podnosim inicijativu da Općina Novi Grad odvoji sredstva za sanaciju spomenika a da nakon toga svake godine u budžetu planira izdvajanje sredstava za održavanje kako samog spomenika tako i kompletnog Parka Prijateljstva.

Sadašnje stanje šalje jako ružnu sliku o tome kako brinemo o prijateljskim zemljama a da ne govorimo o tome da šalje poruku kako nismo u stanju ni održavati ono što nam je poklonjeno.

2. Inicijativa za uređenje dvorišta JU Djeca Sarajeva, vrtić „Zeko“ na adresi Adema Buće 82.

S obzirom da je počela nova školska godina tako su i vrtići otvorili svoja vrata te su, na roditeljskom sastanku koji je održan 28.09.2021. sa početkom u 16:30h, odgajateljice upoznale roditelje između ostalog i sa problematikom dvorišta gore pomenutog vrtića. Dvorište je smješteno u krugu zgrade, koji je poprilično u zapuštenom stanju od toga da nije pokošen pa do uništenog inventara dvorišta. Obzirom da je u vrtiću primljeno 24-ero djece uzrasta od 3 do 6 godina smatramo da je neophodno da djeca moraju imati uređeno dvorište gdje mogu provesti jedno izvjesno vrijeme u dnevnom boravku i prije svega zadovoljiti svoje osnovne životne potrebe a to je kretanje. U doba pandemije u kojem se nalazimo i gdje smo dovoljno bilil zatvoreni smatramo da je potrebno uraditi sljedeće da bi dvorište bilo funkcionalno:

1. Podići visočiju ogradu okolo dvorišta iz razloga što mnogo starija djeca (vjerovatno) ne savjesnih roditelja koriste ovaj prostor i na taj način su uništili ljuljačke koje su postavljene u dvorišti vrtića

2. Obnoviti inventar dvorišta (ljuljačke, klupe, ograđeni prostor sa pijeskom...) po mogućnosti postaviti gumenu podlogu

3. Sistemsko rješavanje redovnog održavanja dvorišta i ukljanjanje trave i korova (ukoliko se ne postavi gumena podloga)

Smatramo (roditelji) da je ovo zaista minimum zahtjeva koji Općina može i mora da ispuni za dobrobit djece te na taj način djeci učini boravak u vrtiću što ugodniji i ljepši.

Očekujemo da u što kraćem vremenskom okviru dobijemo odgovor da li je i šta urađeno po pitanju ove molbe

3. Pokrećem inicijativu da se otkupi zemljište (parcela) za prilaz kući sloboda – tunel DB iz ulice Kurta Shorka, kako bi se obezbijedio adekvatan prilaz objektu koji je u agresiji na Grad Sarajevo značio puno građanima Sarajeva. Sve više posjetilaca i turista zainteresovani su za posjetu tunelu DB sa strane Općine Novi Grad Sarajevo, te je potrebno otkupiti dio zemljišta u korist općine kako bi se uredio prilaz objektu.

-vijećnik Mirza Memišević-

1. da se napravi fizička pregrada između zdrave i bolesne djece u Domu zdravlja Saraj Polje.

2. da se pokriju parking garaže kojima upravlja “Rad” (gornje etaže) solarnim panelima koji bi mogli biti iskorišteni i za snabdijevanje garaža električnom energijom, ali i kao zaštita automobila od vremenskih prilika.

3. da slobodne zelene površine u mjesnoj zajednici Saraj Polje se preurede u parkove za malu djecu i bebe, parkove za osnovce i srednjoškolce - skate park, da se postave klupe za sjedenje, izgradi mali amfiteatar i park za pse. Slobodna površina za ove prijedloge ili dioovih prijedloga je u ulici Adija Mulabegovića pored postojećeg sportskog igrališta uz parking garažu kojom upravlja "Rad".
4. da se instalira video nadzor na parkinzima u našoj Općini.
5. da se otvori manja ispostava pošte koja bi imala i mjenjačnicu u postojećim prostorijama MZ ili na nekoj drugoj lokaciji u mjesnoj zajednici Saraj Polje.
6. da se obnovi trotoar u ulici Ante Babića u blizini kružnog toka na kojem se nalaze olimpijski krugovi, iz pravca Dobrinje prema džamiji Kralja Fahda.
7. da se obnovi trotoar u ulici Želimira Vidovića Kelija, od kružnog toka pored kojeg je postavljen grb Bosne i Hercegovina (Dobrinja) prema Lukavici.
8. da se cijene parkiranja na parkinzima i u garažama kojima upravlja Lokom koriguju u odnosu na nove cijene koje su uspostavljene za pakiranje na/u garažama kojima upravlja Rad.
9. da li su uklonjena vozila sa gornje etaže garaže u ulici Miroslava Krleže, ali ne na način da ih se prebaci na neku drugu lokaciju koju građani mogu koristiti kao parking kao što je to urađeno prebacivanjem napuštenih vozila sa garaže u naselju Vojničko Polje kod Beko prodavnice na garažu u ulici Miroslava Krleže?
10. da li je i zbog čega je PU Novi Grad Sarajevo onemogućena da dostavi Općini Novi Grad Sarajevo podatak o broju registrovanih vozila po naseljima ili ulicama?
11. Da li je Služba Općinskog vijeća primila poziv za obilježavanje godišnjice stradanja u Kalinoviku i ako jeste zašto taj poziv nije upućen svim vijećnicima kao što je to praksa? Na ova pitanja sam dobio odgovor, a na sljedeća nisam te vas molim da, ukoliko je potrebno, pri odgovoru na ova pitanja konsultujete i Predsjedavajućeg Vijeća: Da li je na spomenuto obilježavanje otišlo rukovodstvo ili dio rukovodstva Općinskog vijeća ili neki drugi vijećnici i na koji način je napravljen odabir vijećnika koji su išli na obilježavanje? Da li vijećnici koji su išli na obilježavanje službenim vozilom isti dan bili i selu Umoljani, koje i nije tako usputno mjesto na relaciji Kalinovik - Sarajevo i obrnuto. Kojim povodom su, ako su bili, posjetili Umoljane?

-vijećnik Hadžan Konjo-

Pokrećem inicijativu da se u ulici Adema Buće između brojeva 360 i 470 postave sigurnosne kamere (radari ili ležeći policajci)

-vijećnik Adnan Šabanović-

Pokrećem inicijativu da se u blizini OŠ „Aneks“ postave dva ležeća policajca, i to u ulici Vrbovska i Novopazarska radi sigurnosti građana, a posebno školaraca.

-vijećnica Elza Gaković-

1. Pokrećem inicijativu za kupovinu sanitetskog vozila za potrebe Doma zdravlja Novi Grad – Covid centar Saraj polje. Tražim od Vlade Kantona Sarajevo da u budžetu za 2022 godinu obezbijedi 70% sredstava za nabavku vozila, a da Općina Novi Grad Sarajevo sufinansira nabavku
2. Pokrećem inicijativu da se uradi sve da počne sa radom područna ambulanta u Rajlovačkoj cesti. Ta ambulanta samo radi utorkom, a u prosjeku dnevno prima od 150 do 180 pacijenata.
3. Savjet MZ „Zabrđe“ traži od KJKP „GRAS“ da poštuje red vožnje na liniji STUP-ZABRĐE, te da u slučaju kvara vozila obezbijedi drugo vozilo.
4. Savjet MZ „Zabrđe“ traži od Ministarstva saobraćaja Kantona Sarajevo da preko KJKP „Gras“ produži liniju Željeznička stanica- Rajlovac na Željeznička linija – Smiljevići.

-vijećnik Vernes Ćosić-

1. Pokrećem inicijativu da prema JP „Toplane“ Sarajevo da prostor kod objekta Toplana na Dobrinji 3 koji se ne koristi ustupi na korištenje Općini Novi Grad Sarajevo.

2. INICIJATIVA ZA PRAVLJENJE SKEJT PARKA NA PODRUČJU DOBRINJE

Objasnenje prijedloga inicijative:

U opštini Novi Grad postoji veliki broj ljubitelji ove vrste ekstremnih sportova. Značaj ovog parka je izuzetno velik, jer bi ovi mladi ljudi mogli bezbednije i organizovanije da se bave ovim sportom. Novogradski roleraši, skejteri, vozači bmx-a i mauntin bajka bi dobili prostor na kojem bi na adekvatan način mogli da vežbaju svoje trikove bez bojazni da će ometati saobraćaj ili ugrožavati bilo koga.

-vijećnik Elvis Hodžić-

1. Tražim od nadležnih institucija da se na lokalitetu Otoka -Meandar očisti zelena površina koja je u privatnom vlasništvu ili da se vlasnik zemljišta obaveže da istu uredi.

2. INICIJATIVA ZA IZRADU PLANA I STRATEGIJE RAZVOJA TURIZMA I HISTORIJSKO-KULTURNOG NASLIJEĐA NA PODRUČJU OPĆINE NOVI GRAD SARAJEVO

Objasnenje prijedloga inicijative:

Ova strategija podrazumijeva lokalitete koji su od posebnog značaja za očuvanje tekovina iz prethodnog rata, te objekata koji bi se stavili u svrhu razvoja turističke ponude. Strategija će obuhvatiti sve potrebne segmente i neophodne korake kako bi se osigurali adekvatni preduslovi za što bolju i kvalitetniju ponudu, razvoj društveno kulturnog sadržaja i ekonomskog potencijala, u cilju stvaranja što bolje turističke ponude na području naše Općine.

Strategija podrazumijeva više koraka iz različitih segemenata koji su u uzajamnoj vezi, a kako slijedi:

- Neiskorišteni potencijali
- Tunel DB, ulaz sa dobrinjske strane (suvenirnica, kante za otpad)
- Park šume Mojnilo (putna komunikacija, pješačke staze sa dobrinjske strane, postavljanje klupa i rasvjeta uz pješačku stazu, proširenje sportsko-rekreativnog sadržaja, proširenje ugostiteljskih kapaciteta, suvenirnica, kante za otpad)
- Memorijalni kompleks Žuč (proširenje i izgradnja novih saobraćajnica u cilju poboljšanja pristupa kompleksu te proširenje postojeće ceste prema lokalitetu Golog brda, parking za autobuse i

automobile, izgradnja sportsko-rekreativnog sadržaja: zipline, paintball, kamp sa bungalovima, amfitetatar na otvorenom, biciklistička i pješačka staza sa klupama i rasvjetom prema lokalitetu Golog brda, proširenje ugostiteljskih kapaciteta, postavljanje putkokaza i natpisa prema navedenim lokalitetima i spomen obilježjima, suvenirnica, kante za otpad)

- Izrada web stranice i aplikacije sa elektronskim mapama (trip adviser, bikemap, itd)
- Uvođenje kombi linije prema navedenim lokalitetima – turistički prijevoz
- U cilju realizacije naprijed navedenog, potrebno je formirati radno tijelo, koje bi razradilo strategiju i mehanizme, te učestvovalo u realizaciji iste, te eventualna registracija pravnog subjekta koji će se baviti isključivo upravljanjem i promocijom turizma i historijskog naslijeđa
- Za potrebe realizacije strategije, neophodno je planirati budžetska sredstva za period od tri godine.

-vijećnica Edita Šandal-

Pokrećem inicijativu da se hitno sanira ulica Viteška kod OŠ „Behaudin Selmanović“ obzirom da se radi od cca 20 metara saniranja ceste. Cesta je oštećena radi pucanja vodovodne mreže na tom lokalitetu.

-vijećnik Toni Vukadin-

Tražim da se Općinskom vijeću dostavi spisak svih lica s kojima je Općina Novi Grad Sarajevo potpisala ugovore o djelu u zadnjih četiri godine.

-vijećnica Merjem Ridžal-

Upućujem inicijativu prema načelniku i nadležnim službama da se na području naše općine podrži otvaranje sobe za senzornu integraciju djece sa poremećajima u razvoju. Pomoć je moguće uputiti u vidu jednokratne novčane podrške ili da se ustupi prostor za otvaranje navedene sobe u našoj općini. Jedna soba za senzornu integraciju manjeg kapaciteta već postoji na teritoriji općine Ilidža i takođe je otvorena od strane udruženja za kreativno učenje Mak. Postoji potreba za ovakvim vidom rada sa djecom koja imaju poteškoće u razvoju na području naše općine. Prema evidenciji udruženja Mak postoji oko 100 predškolske i školske djece koji bi koristili sobu za senzornu integraciju u našoj općini. Podršku ovom projektu su već pružile općine Ilidža i Vogošća te se nadamo podršci i ostalih općina.

Obrazloženje: Porast Sensory processing disorder (SPD) ili Poremećaja u procesuiranju senzornih inputa premašio je očekivanja u svijetu i kod nas. Ovaj poremećaj je sve prisutniji kod djece i manifestuje se kroz nemogućnost ili nepravilnu senzornu integraciju tj. integrisanje svih čula koje posjedujemo u sistem koji bi funkcionirao pravilno. Ova senzorna integracija nam je potrebna kako bismo učili, razvijali se, komunicirali, razmišljali kognitivno te općenito napredovali. Ako je senzorna integracija poremećena tretman do sada korištenim metodama će dati slabije rezultate u odnosu na tretman u kojem se koristi soba za senzornu integraciju.

U Sarajevu do skoro nije postojao nijedan kabinet za Senzornu Integraciju po metodi Jean Ayers, koji biprvenstveno kroz rad metodom 1 na 1 doprinio razvoju i napretku djece, a nakon toga i grupnog rada. Takav kabinet imaju Mostar, Lukavac, Kiseljak i Banja Luka. Ova metoda predstavlja priznatu naučnu metodu zastićenu znakom Sensory Integration®, koja putem kombinacije sa Marte Meo metodom komunikacije radi na sistematskom pristupu djetetu u terapijskom okupacionom procesu.

Stanje na terenu je takvo da iako bismo rekli da ovakvi kabineti postoje u Sarajevu samo pod drugom školom senzorne integracije, oni su ili djelimično opremljeni ili nisu adekvatno iskoristivi ili se u njima koriste metode koje su u kontradiktornosti sa terapijom Senzorne Integracije (ABA terapija) ili su to privatni kabineti gdje se tretman od 45 min plaća od 25 do 45KM. Za jedno dijete koje ima potrebu za ovim kabinetom potrebna su minimalno 2 do 3 tretmana sedmično što iznosi oko 400KM

mjesečno. Kao ljekar specijalista pedijatrije sam se uvjerila u efikasnost rada po ovoj metodi. Udruženje Mak ima nekoliko zaposlenih stručnih terapeuta ali je taj broj nedovoljan i u narednom periodu namjeravaju uposliti ljekara kako bi se dodatno podigao kvalitet rada sa djecom koja imaju poremećaj u razvoju.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a